

Aruba HIV Team ta bay introduci test rapido di HIV na Aruba

ORANJESTAD (AAN) – E HIV Team cu a bin ta trahando na Aruba kier logra pa evita cu e situacion di un persona cu tin e virus aki ta complica. Pesey despues di varios reunion a logra pa trece un test Aruba cu ta duna un resultado hopi mas rapido. Esaki ta loke cu Dr.Elena Sanchez di HIV Team a duna di conoce.

E ta e persona cu ta traha na e Policlínica Shocohin hunto cu su otro coleganan dokter, y ta un especialista di medicina interno y di malesanan infectioso y aunke e centro ta traha independiente di hospital e ta den servicio di e instituto. Sanchez ta traha cu un team cu ta consisti di tres internista cu ta atende pashentnan cu HIV-positivo. Nan ta conta cu servicio di un verpleegster di Departamento di Malesanan Contagioso y un verpleegster di higiene di hospital. Segun el a conta, ta trata di un team cu ta reuni regularmente pa trata di mehora e situacion di HIV na Aruba.

Den e encuentronan ariba menciona a cuminsa explora e posibilidad pa Aruba haya un “rapid test” cu ta duna e pashent e resultado hopi mas rapido cu e situacion actual. Pa e proyecto aki, a amplia e team di trabou cu varios persona di Salubridad, representante



di e Fundacion ALFA y Women's Club of Aruba. Personanan vulnerabel mester haci e test aki alomenos un biaha pa aña, sinembargo mayoria no ta cumpli cu e condicion aki, segun Sanchez. Na varios parti di mundo y hasta na Boticanan di e paisnan aki, ta na moda e “rapid test”nan aki. E ta un forma simpel y e hendenan no tin cu pensa hopi pa dicidi pa haci e test. Y tampoco ta keda den hopi tension sperando resultado. E team a studia e diferente tipo di “rapid test” cu ta existi y den esaki a consulta cu expertonan di PAHO, cu inmediatamente a brinda nan ayudo. E organisacion a regala e proyecto di HIV Team rond di 2000 di e “rapid test”nan aki wordo introduci na Aruba. E dia di prueba lo ta 3 di februari na Biblioteca Nacional ora cu Bus di Salud lo bay ta presente.

Pa ehecuta e proyecto aki a busca ayudo di Bus di Salud cu ta pasa den barionan di Aruba. Algun miembro di HIV Team lo traha cu Bus di Salud ora cu nan ta atende publico. E test ta wordo haci di forma anonimo, pues no ta inclui nomber. Y e ta wordo puntra si e kier ricibi e resultado despues di forma completamente priva. Na final si e sali positivo, e persona ta cera conoci di biaha, si e kier, cu e personanan cu ta forma parti di HIV Team y ta wordo puntra si e kier nan guia. E pashent ta haya un splicacion di tur e procedura cu e mester sigui. E team ta bay duna hopi splicacion di pakico mester haci test, recomendacionnan con pa protege bo mes, lo entrega condom, etc.

Dr.Sanchez a enfatisa cu e situacion di HIV na Aruba no ta pio ni miho cu na resto di mundo. Pero cu loke nan

kier logra cu e programa ta educa e poblacion, evita complicacionnan cu un persona desaroya cu HIV. Un persona cu tin HIV y no sa, lo por contagia otro persona y esaki ta sigui core. Tin hopi hende cu ta positivo cu ta cana rond sin sa nada pero aki cinco aña nan ta malo y ta cerca di muri. Esaki ta loke nos kier evita, e ta bisa. Si HIV

wordo detecta y trata na tempo, e persona por hiba un bida normal, traha manera semper, mesun relacion, por ta tata of mama sin bira malo y transmiti e malesa na ningun hende. Pa logra esaki, e persona cu HIV positivo mester sigui su tratamiento.

E HIV Team ta consisti di tur e profesionalnan necesario pa guia e persona cu ta HIV Positivo of tin AIDS.

Diario. - (dialuna 19 januari 2015). p. 11